

四庫全書

集部

欽定四庫全書

紫微集卷十九

宋 張嶠 撰

制

張浚為前宰相該遇明堂大禮赦恩合行檢舉
叙復奉聖旨復觀文殿大學士制

勅總揆岳而居中夙賴爽邦之哲位山川而作鎮方資
表海之勲熙事休成湛恩誕布將善人之是賴豈舊德
之或遺具官某道貫古今學該流略計安天下而厲其

志心在王室而有其功誠慤不移陳義有大臣之節危
難自任許國有古人之風勲庸少迂於初心意氣已吞
於讎敵雖孔明街亭之敗以三等而自貶而仲華龍章
之褫無二色之可闕逮起奉於東藩賴綏安於南紀既
民人甚便其政故績狀稔聞於朝爰因惠澤之敷俾冠
侍班之寵噫翰藩強固所以增廉陞之安榮職秩優隆
既已均弼諧之體貌尚無內外之間共須平定之期可
桂林為因擅差官兵過淮推斫竹木等事於遙

郡階官上各降一官遇紹興九年正月五日赦
敘中侍大夫及遇紹興十年九月十日赦敘遙
郡防禦使制

勅朕合宮禮成肆青象魏往愆宿負咸得虧除具官某
頃以將屯發興自擅有司麗法當以奪官茲用赦原比
還故秩尚思愍慎毋貳其尤可

王仲藪為該大禮赦敘左通奉大夫制

勅朕致選賢能欲同躋於平定容忍臣子用保護其初

終雖嘗觸於憲條其卒歸於蕩宥爰以祭澤之布誕敷
蠲略之文况吾邇臣豈限常典具官某學問傳其素業
德厚殆其天資雄深之文不施於典誥孝謹之行徒行
於里閭曩以微文嘗詒吏議既會赦而一解宜故秩之
稍還御衆以寬朕所以廣仁恩之意計過無憾爾無忘
復玷缺之艱可

耿著為毆打百姓致死特貸命追毀除名停配
降承信郎續為起發大金留務計議使應辦一

行舟船脚乘同共交納官奉聖旨降五官與叙
係已叙未復舊令來該遇紹興十年九月十日
明堂赦文與叙武略大夫制

勅具官某殺人者死古今不易之道也其或降宥得以
官爵自贖既更赦令又得稍還故秩其為恩亦厚矣然
爾之官爵可以復得而死者不可復生也其祇茂恩毋
忘念咎無或狃於幸免再抵罪誅他日有司以義固爭
雖予不得而爾私也爾其戒之

景興宗元係右中奉大夫直徽猷閣所犯因知
潼川府為於川陝大軍券食折伏錢內別作名
目侵支使用不行起發事奉聖旨特降一官後
該遇明堂赦恩合敘復原降一官

許中任左朝請大夫直寶文閣知靜江府為收
買戰馬例皆不堪披帶降兩官未敘間又為奏
本路管下州軍多有待闕官員寄居乞依三路
沿邊州軍不許官員寄居不支俸給等事降充

直祕閣又因在任罷行後不覺察市買於元認
逐廳舖戶處伊市價買物等事先次落職令湖
南轉運司根勘具案聞奏特降三官勒停後遇
明堂大禮赦本官見左朝請郎主管台州崇道
觀依刑部所申與敘一官

曾班為臣寮上言金人登泰州城知通親往軍
前和議差官吏根刷金銀等事奉旨曾班追毀
出身以來文字除名勒停送雷州編管後該遇

明堂赦與敘左朝散大夫

安邠右朝散郎成都府路轉運判所犯因應副
王彥一軍錢糧未見起發數目等事先次降兩
官又為因吳玠軍前糧食闕乏不行裝發放罷
追五官漆差監郴州在城酒稅後遇明堂大禮
赦與敘左通直郎

侯慤元係右朝請大夫江南西路安撫大使司
參謀官所犯因措置招安建昌軍叛兵事務冗

并不覺察諸項人馬因而作過等事特降兩官
後該遇明堂赦恩敘右朝請大夫制

勅朕施配天之澤以一洗於庶辜憫負罪之臣用稍還
於故敘爾頃承委寄薦抵尤違既更歲月之淹亦既思
愆之久其從寬宥畀復官聯欽服予恩毋忘爾戒可

陳靖直元係右中奉大夫利州路提刑所犯因
在任買販鹽貨等事先次放罷特降三官後該
遇明堂赦與敘右中散大夫致仕制

勅朕施配天之澤以一洗於庶辜憫負罪之臣用稍還於故序爾頃承委寄薦抵尤違既更歲月之淹亦既思愆之久其從蕩宥畀復官聯雖筋力已愆顧無尸於事任然德義自飭宜尚慎於桑榆可

魯彥元係中衛大夫秀州刺史所犯因淮東宣撫使司按發為封閉門戶致餓死將司韓全并受豪戶孫承事木綿等入已事特旨降橫行遙郡七官勒停令該遇明堂赦恩勘會昨於淮陽

軍兩次立功理宜優敘特與敘親衛大夫秀州
刺史制

勅朕施配天之澤以一洗於庶辜憫負罪之臣用稍還
於故秩具官某頃以貪虐自抵憲網茲更赦令已復官
聯念歲月之既淹加功能之可錄爰推異渥畀敘橫班
祇服予恩無忘念咎可

許中廣東經略司申海賊詹德劫虜作過其降
授右修職郎潮州推官許中躬親捕獲詹德等

與敘復右從仕郎制

勅具官某比者負海之郡久罹寇攘既以文降復為桀
惡爾能迹捕一境為清其俾官榮以為勸獎益圖飭厲
以稱寵名可

仇愈為該大禮赦左朝散郎制

勅君子修己以毋貳過為賢王者用人豈以一眚廢德
矧吾近列嘗麗寬科宜從洗心之文以開棄咎之路具
官某早以文學而進晚聞吏職之修事不辭勞治皆可

迹逮閱歲時之久益抒屏翰之功中以辭難嘗詒吏議
既會赦而一解宜故秩之稍還御衆以寬朕所以廣仁
恩之意計過無憾爾勿忘復玷缺之艱可

張琦昨在淮西宣撫司水軍統領為冒請逃亡
事故人錢米事除名勒停送吉陽軍編管今兩
遇赦特與敘成忠郎制

勅朕施恩於海內雖昆蟲草木莫不愷澤顧如爾等亦
所不遺也尚祇明命毋怠可

宋超為首先將帶軍馬一城官吏渡淮來歸淮
西宣撫差權知亳州烏珠親率重兵攻打遂致
失守除名勒停今該遇大禮赦係歸正之人特
與敘從義郎制

勅夫軍敗不面夷城陷不能死在於理法固有常刑矣
朕惟使過之義責爾後圖施甄收敘之恩復爾秩序朕
與爾則厚矣而爾所以報朕者謂何尚思勉哉以蓋前
恥可

梁興趙雲李進先於靖康因金人攻破太原以
南侵犯不肯順番首先率本府及絳州管界忠
義人兵措置收復河東懷澤州隆德平陽府渡
河尋歸本朝有偽齊占據黃河以南隔絕前來
不得復度河北與番賊大軍戰鬪一十餘年大
小數百陣前後約殺頭領三百餘人堅守忠節
永不順番自後思本朝於紹興五年內前來歸
朝梁興武經郎閤門宣贊舍人趙雲敦武郎李

進修武郎制

勅朕惟河朔諸郡間淪陷於干戈倣擾之餘忠義遺民終不諼乎國家涵養之德爾等轉徙十年之後間闕百戰之餘脫身歸來深用嘉歎俾躋榮於秩序且風示於邇遐益勵遠圖以卒前志可

耿著昨自淮陽軍軍前齋奏赴行在內殿引對特與敘復舊官制

勅抵罪以情則法不嫌於太密推恩以恕則理有貴與

從寬具官某項以賊殺不辜已從末減後以薦逢赦令
稍復官朕惟擅殺者非貶降之可懲而責效者在仁
恩之加厚是用盡還故秩計其來功尚無忽於思愆深
自圖於報國可

王仲山為知撫州失守日除名勒停紹興九年
正月五日赦文應軍興以來州縣官曾經失守
投降之人不以存亡並與敘復生前係中大夫
與敘復原官制

勅朝廷每赦令之下一洗庶尤雖其淪謝亦蒙降宥爾
頃詔吏議夷於士伍既沒之後數更霈澤今其遺孤援
恩自列惟爾宿負既隔於存亡而吾湛恩何間於幽顯
俾還故秩盡削丹書啟爾後人毋忘報塞可

曹伯達為係趙榮帶到一行官屬及焚毀了番
人文榜特與補正迪功郎制

勅具官某向者敵人傳檄城邑爾能率眾守義抗賊不
有褒榮何以示勸俾起家於文吏以風動於邇遐益勵

爾圖無忘忠力可

伍昌禹元係鳳翔府僧因金人犯陝西麟遊知縣趙璧守節不屈招集忠義萬五千人後來陷偽更不出官依舊為僧藏泊川陝宣撫司申已差充鳳翔府推官奉旨特與補迪功郎制

勅爾本以浮屠能知忠義守節自好不污偽官申放命書俾齒任列尚思飭厲以報國恩可

趙裔為充瀘州都知兵馬使年滿補承信郎換

給制

爾積勞累日之效既不可得而考矣徒以嘗經大臣閱實特越有司之文而申命汝亦能祇承恩渥而圖報稱乎

懷德崇義體性率義歸仁劉信為前來歸正供說事宜忠義可嘉特補承信郎制

勅具官某人爾淪陷既久幡然改圖嘉其反正之忠俾與武階之列益思厲勉以報國恩可

徐三兒補承節郎齊二哥補承信郎為遠來歸
正委實忠義制

爾以裔民志慕華夏可無寵獎以慰其心並列武階祇
服恩渥

陳在楊沂中申蘄縣管界巡檢李溫將帶兵甲
前來荆塗山擇穩便下寨其李溫原於客人船
上安泊不期上件船不覺入淮前去切慮別有
疎虞衆軍張言等狀推許陳在權攝上件職事

率衆與番人鬪敵委見忠義可嘉伏望詳酌特
補一使臣名目奉聖旨特補承信郎制

勅爾以軍伍威攝拒寇嘉其忠力俾服武階務立尤功
以圖報事可

衛振為父靖招收李忠賊馬陣亡補承信郎制
爾父頃以戰賊殞於行陣賞延及爾遂服武階申錫命
書無忘誌慎

王叔哥為遠來歸正本朝委實忠義補承信郎

制

勅爾淪陷既久幡然改圖嘉其反正之忠俾與武階之列益思勉厲以報國恩可

何九章為妻父賈信與董先賊兵鬪敵身死得兩資恩澤內將一資與次男僧奴其僧奴未曾承受間身死乞改正補承信郎換給

在法非執政大臣不得貶爵外姓而死者顧得之所以厚其報也肆予命爾往服官榮無以得之之易而墮

乃力

陸保兒係北來歸正與補承信郎制

爾以裔民歸心華夏俾秩官資以為慕義者之勸尚思
勉哉

金穆昆于俊成契丹長行李嘉努為遠來歸附
于俊成補保義郎李嘉努補承信郎制

爾等皆以裔民歸心華夏並秩官資以為慕義者之勸
尚思勉哉

馬興為忠義首領不忘朝廷見團集民社保護
鄉閭與補承信郎制

勅爾天資忠赤志徇國家保固鄉閭不污不義俾躋武
列以勸忠勞益勉爾圖無墮乃力可

趙舜舉因妻父武功大夫劉奇掩殺叛賊陣亡
與補承信郎制

勅爾之外舅項沒於賊貶爵及爾遂列武階申錫命書
毋忘恭慎可

王處仁為岳飛申自紹興七年承受本司往來
軍期機速文字到今別無稽滯伏乞指揮依一
般進奏官邢子文蘇公亮體例先次補授合得
出職名目依舊在院祇應奉聖旨補承節郎制
勅爾為郎吏隸大將幕府積年矣羽書往來道路無壅
俾登武列用勸勤勞是為異恩益殫爾力可

宋彪為自番人圍閉宿州至今堅守山寨捍禦
金人不順番前來歸朝委實忠義特與補正承

節郎制

爾脫身重圍義不反顧載嘉忠順宜有褒優即其武階
遂俾真授益思勉厲以答恩榮

潘田為自密州將家遠來歸正并供到京東事
特與補正承節郎制

勅爾脫身賊中能圖反正探刺事實以諗有司宜加褒
優用勸忠義其祇恩命益務輸忠可

魯和劉錡申契勸進奏官魯和自承受本司軍

期奏報等文字並無稽滯乞昨來湖北京西宣
撫司進奏官王處仁體例先次與補受出職名
目依舊在院承發本司文字奉旨與補承節郎
制

勅爾為吏郡郎且司邊遽奏報毋墜是為有勞俾列王
官尚服乃事益務勤恪毋懈於前

張公舉李進劉榮為殺敗金兵張公舉轉武顯
郎李進轉修武郎劉榮循一資通五資補成忠

郎換給制

爾等奮由行伍自致戰多宜有褒嘉以示勸獎往祗甄敘之寵無忘力疾之圖

崔紡為上殿特與改合入官制

勅以假版而為真授與自選調而遷京秩皆異恩也汝未閱歲而得異恩者再焉爾將何以報國乎尚思勉之可

朱之彥為應副大軍糧草循一資又為措置良

家子弟籍為義士五萬餘人特改宣教郎換給
制

爾頃為令饋軍無乏又能糾集義旅助宣兵威宜有褒
加以示勸獎祇服明命無替厥勤

王存為於未交地界已前與蔡綬等結集忠義
遊說陝西諸帥為叛逆投番人朱光庭李覺先
捉獲事發並追攝赴開封送獄枷項禁勘存以
父祖世食朝廷爵祿委與蔡綬等同謀存等招

伏之後金人留守劉陶百端拷訊在獄一百四十餘日合斷絞罪緣與南使王倫親戚特議放免乞推恩特改承務郎制

勅爾頃與蔡綬等遊說陷沒之人於關右事覺被害者甚衆其生者既秩以官榮而死者亦加隱恤矣豈獨遺於爾乎俾陞京秩以勞忠勤祗服明恩勉之無斁可

費樞為告發結集陳享等勞効改承務郎換給制

爾往以變告羣盜迹捕皆得大臣承制寵以京秩有司按狀遂俾為真往服恩榮無忘自好

唐璟任和州通判日金人侵犯勢力不加遂至殺害贈兩官制

勅爾頃以郡丞登陴捍寇死獲其所良所歎傷秩以議郎俾書其柩以明忠善之有報也尚歆耀之可

名闕特贈兩官制

勅荷戈而出已輸衛社之忠裹創而還終遂捐軀之節

其施愍典以勵庶臣具官某以沈毅之資更戰伐之久
義勇奮發不避死亡矢刃淫夷卒至淪沒惜無萬金之
藥可全爾軀其稽二等之褒以昭予寵尚或未泯庶克
畝承可

楊再興王蘭高林羅彥等為與番兵接戰陣歿
各贈五官制

捐軀徇義者臣子之極忠隱卒崇終者國家之盛典其
敷錫於名命以風視於邇遐具官某拔由閭伍之中奮

迹戎行之右秉懷壯烈挺志沈雄比隨票姚之師深入
強敵之境方幸金吾之擊郾屢以勝聞復悲國子之歸
元遂推閔典俾進階於橫列用追賁於營魂豈徒章死
事之褒亦以為在列之勸惟其英爽尚識哀榮

田守忠等因功合轉武功郎已贈三官欲各更
贈兩官呂福等因功合轉從義郎已贈兩官欲
各更贈一官制並係順昌府與金人烏珠等節
次見陣戰歿

勅爾等比過敵鋒轉戰疾力遂捐軀命深惻予衷考退敵之功固應顯賞稽加等之命宜厚飾終精識不渝尚膺休寵可

邢方為與敵接戰陣亡贈兩官與一子恩澤制爾頃與敵戰歿於行前死事之節不可以莫之酬也既追賁其泉壤又收錄其嗣人尚其有知歆予渥澤

樂遇梅永亨各贈兩官與一資恩澤更各名守闕進義副尉趙宣周孝曲育各贈兩官與一資

恩澤並係建炎年間因隨軍陣亡官兵

勅爾等頃緣國事殞命顏行向隔王靈未遑褒恤昨令
搜訪遂以名聞嘉其忠誠痛悼曷已追榮秩序恤錄嗣
人魂而有知尚服予寵可

張順等係收復海州與金兵戰亡之人各贈兩
官恩澤兩資及銀絹錢米羊麵酒制

勅爾等比與寇殞命戎行嘉其死國之忠宜有追榮
之典其放書命祿以武階仍錫官榮恤錄嗣子或以故

秩即畀後人賻贈有加併申褒恤惟其未泯尚克歆承
可

魏經為城破戰死贈武翼郎閣門宣贊舍人兩

資恩澤制

勅朕惟亳社方得復失此將帥不任之咎也守者既不
能死城郭委之出走爾乃率衆拒敵城已陷而不為屈
予念元元之遭罹嘉爾之死義良用悼傷武階之峻上
閣之華併告其第又官其嗣子二人豈徒為爾報哉將

以勵庶臣之節且使所任不肖者知焉可

邱贊劉輔之韓元各贈二官恩澤五資周贍左
迪馬贊杜橫各贈六官恩澤依舊使臣李友等

依舊制

勅具官某等朕比較大將上予死事之臣追賁以官錄
後恤孤既施閔典矣念其徇國之意猶未厭於予心申
錫命書載加隱卒尚其不泯服我渥恩非將悼痛之思
亦以為忠義之勸可

楊再興高林王蘭羅彥姚侑李德為岳飛奏已
蒙贈五官今乞贈七官恩澤六資姚侑李德各

贈六官恩澤依舊羅彥依舊制

勅朕閔死事之臣既加追賁慮未盡於隱恤肆申錫於
命書具官某捐軀百戰之餘殞命鋒刃之下原其積志
悼痛不忘深陋齊人尚稽涿聚之賞遠師漢武更字羽
林之孤俾再刻於密章示極隆於閔策精爽未泯尚服
哀榮可

王昌固與贈三官恩澤五資田守忠贈三官恩
澤四資陶清贈三官恩澤兩資更與一名下班
祇應呂福贈兩官恩澤兩資李福贈兩官恩澤
兩資宋綱贈兩官恩澤一資更與一名守闕進
義副尉張宥係自効人贈承信郎與一子守闕
進義副尉王勝贈兩官恩澤一資何譚贈兩官
與一子父職名盧城贈承信郎與一子父職制
並係順昌府與金人四太子轉戰臨陣戰歿

勅某官爾等退敵於陣不避死亡金鍬淫夷卒至淪歿
朕惟春秋死事之義加序愍章稽羽林字孤之文恤錄
嗣子多寡有等一視厥功精爽如存尚歆恩渥可

龐仲先贈三官與恩澤四資南堅贈兩官與恩
澤兩資潘興贈兩官與恩澤一資更與一名守
闕進義副尉承節郎李福贈兩官各與恩澤一
資賈義贈兩官各與一子父職名王京贈承信
郎各與一子父職名制並係宿州陣亡官兵

勅具官某等比戰符離殞於行陣雖功庸之弗就顧節義之可旌納襚賞延併申褒錄或以故秩即畀嗣人尚其有知服予恩渥可

尚竒贈兩官與一子父職名开遇賽音蒙香唐仲來勇安勝都商石有伊克劉彥季暉並贈承信郎各與一子父職名制並係同前陣亡官兵爾等比戰符離殞命追褒秩序以慰營魂具以故官命其嗣子尚其不寐歆服予恩可

欽定四庫全書

紫微集卷二十

宋 張嶠 撰

制

資政殿學士韓肖胄故父治可特贈少師制

勅朕廣大建祀以禮承天之休神况昭答不敢專饗既以推之宇內豈吾元臣之後嘗預四近之列追褒寵獎而有不被其先者乎具官某故父某以絕異之姿承世濟之美所憑既厚所見又大宜其光融休顯克配前人

雖中外踐揚不為不遇而蓄德未究宜開嗣賢嘗以詔
謀典吾幾祕上休禰室既躋前傳之崇其致命書更陟
維師之峻俾其廟祀永耀寵綏可

故母文氏可特贈冀國夫人制

勅朕褒厚臣工顯揚先世凡我在列均被湛恩顧吾大
臣嘗登宥密既以追榮考廟若其內助忽遺不錄何以
慰其凱風寒泉之思乎具官某故母某氏出於大家來
嬪相室所憑厚矣令善之資不移於驕貴廉約之操克

謹於閭彙遂蓄餘休以詒後嗣既已正位小君笄珈有
耀其易封於大國用永賁於廟祧精識不渝服予休寵
可

繼母文氏可特封鎮國夫人制

勅昔穎考叔以封人之賤能以嘗羹之語感移其君傳
以為能錫其類矧吾有四海之富而東朝之養猶隔晨
昏爰推陟屺之思成爾將母之慶茲因廟澤以迪惠心
具官某繼母某氏憑藉之美容服之盛歸於大門克配

君子既享從夫之榮復以因子而貴已開成國號曰小君既無以加矣其增脂田之奉以申寵秩之懿俾爾孫子永嘉賴之可

試御史中丞何鑄故父瓘可特贈朝請大夫制朕惟天之報施不遽在於朝夕之間君子修身亦將期於必世之後百年之計莫如植德諒前人之本心非此其身在其子孫固今日之可驗具官某故父某經術絕世孝謹刑家抱修能而不施卒齋志於黃壤有德器而

自過能遂致於青雲因大享之涓成方均釐於海縣如
吾執法可後褒親進秩疏榮足慰風木之念刻章納祿
用綏何氏之祧可

母吳氏可特封太碩人制

朕肅祗舊典稱秩明禋神靈宴娛祝嘏並告幸大事之
獲考豈豐福之敢專顧通籍衆臣咸被揚親之寵矧甘
泉法從可稽壽母之褒具官某母某氏生於大家來嬪
令族山河象德圖史禔身事夫以恭夙有如賓之譽生

子而令咸多稱願之言遂以才賢為吾執法合宮大享
實預侍祠顧駿假之無譁繫糾繩之是賴用頒書命以
慰親慈名稱益隆不愧武昌之號脂澤有奉佇開石窀
之封祇服恩榮益綏祉福

妻張氏可特封碩人制

朕御彤管之詩而歎婦德之賢覽采蘋之什而知保家
之助屬者涓成盛禮大賚四方均釐既以盡褒揚之典
自外及內顧可遺家室之私具官某妻某氏奉養無違

體柔而正山河象德具容潤之儀禮法兼資全鍾郝之懿左右夫子裨益宏多輯寧親連門風載睦用錫號名之美以為閨門之光宜爾家人嗣膺褒寵

試中書舍人王銖故父仁恕可特贈承議郎制
勅朕顧瞻許洛之間皆吾世臣之後侍祠致昨無廢於時方其平居流風具在喪亂以後喬木莫存屬當明禋懷舊太息惟茲王氏實彼大家其視諸韓為外王父方稱大禮有子在庭具官某故父某土風鍾汝穎之竒資

質挺家庭之秀既承世德之積累兼資外氏之漸摩於其少時已成令器出居官守所臨有聲歸教兒曹其言可訓雖積德之不耀果天命之靡愆肆因惠澤之施爰舉愍書之典千鍾不洎何勝罔極之悲十世其昌以彰有後之報可

母余氏可特封太令人制

勅升侑合宮謂其稷親而先帝錫福羣下故將自葉以流根惟子侍臣既褒禰廟顧其壽母可後疏恩具官某

母某氏如山如河有容潤之德其華其實兼室家之宜
為婦而恭為妻而義恪修祭祀輯睦閨門躬勤瘁於早
年享光榮之後福以子而貴顯膺名稱之崇俾壽而昌
佇啟脂澤之奉欽予明命益介爾祺可

故妻余氏可特贈令人制

勅承天地之福蒙祖宗之休不敢專鄉而獨私既以推
之天下徧於羣物矣徒欲德施之廣寧有存沒之間具
官某故妻某氏幼服訓戒以自約飾及事君子率禮無

違雖秉德甚賢當膺服飾之盛而賦命勿永不及光榮之日宜疏恤典增寵號名尚服明恩以綏厚夜可

妻余氏可特封令人制

勅朕廣大建祀並侑祖宗承神至尊罔弗祗若克綽厥福均被邇遐既先侍從之臣亦逮室家之壺具官某妻某氏凝姿婉約秉德柔嘉如桃夭之宜室家躬采蘋以承祭祀穆然閭則足稱婦師靜女其姝宜載彤管之盛君子偕老允膺稱謂之隆佇開湯沐之封以耀笄珈之

德欽承恩命祚嗣其昌可

資政殿學士李光故父高可特贈太子太保制
勅朕交神於祀既祇若於舊章錫福於民以風示其符
應惟我三朝之舊嘗聯四近之班可無褒賁之恩用以
寵綏其禰具官某故父某慈祥居里孝謹刑家抱能不
施莫展平生之用餘慶於後遂儲奕葉之休爰以才猷
預吾幾政考之彛典錫以密書東宮調護之官益隆於
秩序廟室烝嘗之奉永燕於雲來可

故母史氏可特贈文安郡夫人制

勅朕燎薰皇天受神明之况薦裸太室蒙祖考之休敢
懷專鄉之心用舉均釐之典眷吾舊弼可後褒親爰施
刻蜜之章用慰寒泉之念具官某故母某氏生有令德
嬪於甲族其華其實早聞家室之宜如山如河克成容
潤之美蓄慶於後以大厥家命世生賢嘗預吾政笄珈
有耀既正小君之名湯沐增封更荒大郡之履精爽不
昧尚克享之可

權尚書禮部侍郎鄭剛中故父卞可特贈奉議

郎制

勅朕還觀扈從皆吾近臣視其經術深醇則知有傳家之學顧其仕宦崛起則知席積慶之餘推本源流可無追賁具官某故父某以行義發聞於閭里以文學見推於士林抱修能而不施齋高志而獨老修之在我責報於天有子而賢德器自過逢時奮發遂大厥家肆因有畀之恩用慰無窮之念議郎告第以賁幽窀尚其有知

歆子褒恤可

故母盛氏可特贈令人制

勅婦有三從之義服飾則繫其夫國家廣教孝之風品
秩或視其子屬者大事獲考均釐萬官宜沛湛恩用褒
泉壤具官某母某氏少有賢行嬪於德門奉事良人則
甘乎牛衣之貧逮撫幼孤則幾於織屨自給雖隱約之
備至終操行之不移卒成其兒以儒自顯千鍾不洎雖
深風木之悲四德無虧終被恤章之報尚其精識永允

而宗可

妻石氏可特封令人制

勅朕篤報本之誠既承神於彤嚮廣敷錫之義遂浸福於黎元顧吾侍從腹心之臣實有室家左右之助可無褻寵以逮其私具官某妻某氏秉德幽閒凝姿婉孌既笄而承父母能盡於女工執饋以事尊章遂成於婦順其錫贊書之茂俾增稱謂之隆象服是宜方膺於來寵君子偕老無怠於相成可

洪州觀察使呼延通故父昌可特贈武義郎制
勅朕祇見合宮上儀獲考均釐遐邇無間顯幽具官某
故父某潛德莫知慶開厥嗣正位廉車既通顯矣俾申
追賁之恩益進武階之峻惟其知識尚或能歆可

母劉氏可特贈太碩人制

勅廟澤之行既追褒其禰室若其內饋或遺則何以慰
人子念母之心哉具官某母某氏柔德懿行雖不著聞
有子而貴遂從其秩亦可知其積累所自矣稱謂甚隆

尚能顧享可

妻宋氏可特封碩人制

勅朝廷褒崇之典下逮室家豈無意乎蓋將責其內饋
之助相戒以圖報焉具官某妻某氏稟資柔令歸逢其
良遂階光顯游膺封號每加益隆其相爾夫仰酬恩禮
可

寶文閣直學士綦宏禮故父亢可特贈銀青光

祿大夫制

勅朕昭事上帝及延服之百神敷惠庶工逮輝胞之衆
隸有加邇列不與湛恩慶賜之行固以克綽厥福追崇
之典必也揆厥所元宜錫命書以光禰室具官某故父
某學問深博經術通明官政飾修獨高循吏之譽陰德
憑厚克開後嗣之賢德義文章著稱當世還以所襲上
休其先三品崇階榮其告第九原英爽尚服子恩可

故母趙氏可特贈文安郡夫人制

勅朕惟惠澤之行下浸於黎元追襲之文復加於禰室

豈其內助不與湛恩如是則何以慰人子念母之心彰
婦人從夫之義乎具官某故母某氏蘋藻之奉素嚴於
承祀山河之德夙著於宜家為婦而有相成之賢為母
而有義方之訓原閨閫之素修固厥後之宜大是生賢
子坐振一時還以休光顯揚先德副筭之盛已正位於
小君脂田之腴其更荒於大郡俾其後嗣毋怠厥承可

利州觀察使王勝故父

缺名

可特贈武畧郎制

勅朕祇見合宮上儀獲考均釐遐邇無間顯幽具官某

故父某潛德莫知慶開厥嗣正位廉車既通顯矣俾申
追賁之恩益進武階之峻惟其知識尚或能歆可

故母周氏可特贈碩人制

勅廟澤之行既追褒於禰室若其內饋或遺則何以慰
人子之念哉具官某故母某氏柔德懿範雖不著聞有
子而貴遂從其秩亦可知其積累所自矣稱謂甚隆尚
能顧享可

繼母牛氏可特封太碩人制

勅升侑合宮錫福羣下顧其壽母可後疏恩具官某繼
母某氏為婦而恭為妻而義爰以子貴顯膺褒榮俾壽
而昌益介厥福可

故妻楊氏可特贈碩人制

勅朕惟人臣之於室家生則共其甘苦沒欲致其哀榮
貴賤一也廟澤之行顧可亡褒賁之典哉具官某故妻
某氏稟資柔令賦命不融茲因廟澤俾增稱謂惟其知
氣尚克能敬可

故妻張氏可特贈碩人制

勅具官某故妻某氏秉德柔嘉凝姿婉約逮良人之通顯既已隔於存亡祿以恩章尚知歆服可

資政殿學士左中大夫富直柔故父紹庭可特贈太子太傅制

勅肇禋重屋大祀休成推上帝之仁既錫福於四海廣教孝之義以加惠於庶工矧吾舊德之良嘗預幾庭之列其於禰廟可後褒揚具官某故父某資才絕倫憑藉

甚厚綽有名家之韻稱其世德之餘謂當勃興繼承於世烈遂儲餘慶克聞於嗣人茲因廟澤之行用沛納書之寵東宮調護之地益峻於品秩春秋烝嘗之奉永照於雲來可

故母劉氏可特贈普寧郡夫人制

勅婦人有三從之義服飾則繫其夫國家廣教孝之風褒揚蓋因其子屬者大事獲考均釐萬官宜沛湛恩以加泉壤具官某故母某氏山河其德婉孌其容逮事舅

姑早奉執笄之饋無違夫子有嚴舉祭之儀訓教具修
閨門載睦雖三徙實資於陟屺而重茵永悼於終天可
無密印之章用慰寒泉之念俾易封於湯沐用益耀於
春秋可

武功大夫解忠故父青可特贈武經大夫制

勅朕祇見合宮上儀獲考均釐遐邇無間顯幽具官某
故父某潛德莫知慶開厥嗣其推飾壤之典以為廟室
之光可

故母薛氏可特贈碩人制

勅廟澤之行既追襲於禰室若其內饋或遺則何以慰
人子念母之心哉具官某故母某氏柔順輯其閨門淑
慎修其婦道有子而貴遂從其秩稱謂甚隆尚能顧享
可

故妻房氏可特贈碩人制

勅朕惟人臣之於室家生則共其甘苦沒則致其哀榮
廟澤之行豈可忘追賁之典哉具官某故妻某氏稟資

柔令賦命不融茲錫贊書俾增稱謂知氣如在尚克能
歆可

妻孟氏可特封碩人制

勅朕褒寵之典務極優隆廟澤既行下逮家室具官某
妻某氏稟資柔令歸逢其良洵膺封號益加美稱以示
恩光其相爾夫共圖報塞可

徽猷閣直學士向子諲弟右朝散郎子謨故父
宗明可特贈沂州防禦使制

勅朕肇裡重屋大祀休成推上帝之仁廣教孝之義使
顯揚者獲報美之效追遠者慰明發之思顧吾扈從之
臣可後褒親之典具官某故父某資材畢給蔭藉高華
德足以及物而不被於人材足以當世而不見於用遂
蓄餘慶垂裕後昆列城禦侮之崇用告其第九原悽愴
之識尚或能歆可

故母李氏可特贈碩人制

勅朕惟惠澤之行下逮於臣工追褒之文既加於禰室

豈其內助不與湛恩如是則何以慰人子念母之心彰
婦人從夫之義乎具官某故母某氏柔儀婉孌令德幽
閒躬采蘋法度之防致鵲巢積累之盛并襲餘慶以啟
後人愍冊之行益隆位號光塵如在歆我恩榮可

利州觀察使翟琮故父興可特贈少傅制

勅朕祇見合宮上儀獲考均釐遐邇邇無間顯幽具官某
故父某潛德莫知慶開厥嗣其推節壤之典以為廟室
之光可

母聶氏可特封越國太夫人制

勅朕升侑合宮錫福羣下顧其壽母可後疏恩具官某
母某氏蓄德於身慶流於裔遂以子貴顯膺褒榮益加
美稱用介厥福可

左朝散郎充徽猷閣待制潘良貴故父祖仁可
特贈朝奉大夫制

勅朕本秩禮以嚴天地之奉薦和樂以格神靈之和儀
物備陳縕豫紛列第祿並貺盼饗豐融嘉與臣民均茲

祉福顧茲甘泉之舊可稽陟屺之褒具官某故父某孝
謹刑家經術自著最高鄉曲之譽不求聞達於時修之
方寸之間責報必世之後乃蓄餘慶篤生顯人茲因廟
澤之行用沛納書之寵春秋時祀尚侈褒榮可

故母施氏可特贈令人制

勅廟澤之行既追褒於禰室若其內饋或遺則何以慰
人子念母之心哉具官某故母某氏柔德懿範雖不著
聞有子而貴遂從其秩亦可知其積累有所自矣稱謂

甚隆尚能歆享可

左通議大夫王庶故父茂可特贈太子太保制
勅朕肇禋重屋大祀休成推上帝之仁既錫福於四海
廣教孝之義以加惠於庶工使顯揚者獲報親之心追
遠者慰濡露之感其施恩渥以賁幽局具官某故父某
篤厚裋身謙恭居里素高鄉曲之譽不求聞達於時修
之方寸之間責報必世之後乃蓄餘慶篤生顯人茲因
廟澤之行用沛納書之寵東宮調護之地益崇於品秩

春秋烝嘗之奉永燕於雲來可

故母劉氏可特贈大寧郡夫人制

勅廟澤之行既追褒於禰室若其內饋或遺則何以慰
人子之念哉具官某故母某氏柔德懿範雖不著聞有
子而貴遂從其秩亦可知積累之自矣稱謂甚隆尚能
顧享可

顯謨閣直學士鄭滋故父集成可特贈銀青光

祿大夫制

勅朕登頌祇之堂膺受多福施配天之澤錫厥庶民顧
吾邇列之良可後揚親之典具官某故父某稟敦厚慈
和之質負博聞多識之懿而賦命不偶齋志莫伸蓄其
餘澤以詒後嗣篤生令子為時聞人還以休光追襲禰
室銀印青綬之貴光祿古官之崇以告子第尚克嘉之
可

故母李氏可特贈蘄春郡夫人制

勅朕惟惠澤之行下浸於黎元追襲之文復加於禰室

豈其內助不與湛恩如是則何以慰人子念母之心彰
婦人從夫之義乎具官某故母某氏德合閭彞動應圖
史雖積行累功之勤不顯生平之日而錫羨流光之慶
宜惟後嗣之承推其欲報之心祚以刻章之命錫號小
君雖云其舊更食大郡褒賁則新知氣不忘尚歆斯寵
可

欽定四庫全書

集部
紫微集卷二十一

詳校官庶吉士

臣瑚圖禮

主事

臣呂雲棟覆勘

欽定四庫全書

紫微集卷二十一

宋 張嶠 撰

口宣

賀正旦使人到盱眙軍御筵口宣

遠持使傳來慶歲元喜聞入境之初宜厚示慈之禮特
加撫問期體眷懷

鎮江府御筵

夙馳使聘來講慶儀適寒沍之屆節涉阻修而在道特

加宴好用洽歡心

回程鎮江府御筵

歸驂北道涉境南徐眷言行邁之勞加厚惠慈之禮茲
循彛典宜體眷懷

值雪御筵在驛

禮畢明庭瑞呈密雪即賓亭之安便折燕俎以從容庶
樂使華庸昭眷意

平江府御筵

遠馳使命修慶春朝冒霜露以修塗次輶車於近郡式
頒燕禮庸示眷懷

赤岸御筵

先春遠使造國近郊諒勤行役之勞特厚燕慈之禮庸
昭眷意用洽歡心

就驛射弓御筵

馳車陟遠授館云初禮方講於射候燕特豐於賓俎茲
循彛典用洽歡心

喜雪御筵

季冬調呂瑞雪應時肆頒燕豆之豐用表化鈞之變行
其和樂體此眷懷

又賜酒菜

一元調化六出瑞時頒內府之甘珍侑初筵之燕衍庸
昭眷意共樂歲祥

使人賀畢賜御筵

肇臨元日既講盛儀折芳俎以示慈樂嘉賓而式燕庸

昭眷禮茂介春祺

又賜酒菓

肅馳使傳修慶元辰既明廷盛禮之行宜嘉賓芳醪之
賜意斯將厚禮則有加

回程盱眙軍御筵

肅馳軺傳還次淮濱有加將送之儀式啟惠慈之燕庸
昭眷意庶洽歡心

回程平江府御筵

肅聘使輶經從會府加厚送將之禮用休跋履之勞燕
俎式陳行騶少憩

朝辭歸驛御筵

既講慶儀將馳歸馭爰示慈於燕豆尚少憩於賓亭寵
禮有加眷懷式示

又賜酒菜

既修慶幣將戒歸驂錫御府之甘珍侑賓亭之燕樂庸
加禮遇宜體眷懷

到闕值雨御筵移在驛

遠抗使旌既修慶禮屬為霖於寒序就折俎於賓亭庸
示眷懷庶從款席

策問

問

問人材之難也久矣上之人雖有用才之意而或莫可
得而致下之人雖抱有為之志而每患其無以達然則
推轂當世者固大臣之任也然其說有二焉持詩之羔

羊之說者則曰吾無私交之行也何以薦士為持易之彙征之說者則曰惟善故能舉其類此政吾任也二說既立鮮有不失於一偏者魏其武安厚賓客人主至於切齒然崔祐甫則以除吏八百而號賢相霍子孟未嘗薦士而漢之得人於斯為盛至於常衮行之則士有賢愚同滯之歎四者之事甚類而得失之迹相反何也願與諸公論之

問夫進賢受上賞蔽賢蒙顯戮古今之通義也進賢固

在所賞矣苟所進者不肖而不加誅焉則託推轂以市
恩於下者何所懲艾耶故高祖以千戶賞魏無知以其
能進賢也然考之漢法有坐所舉者以故不實之典則
又欲絕其舉之濫也國家廣進賢路內則付之宰相大
臣外則委之監司郡守使得保任以次而升其來有自
矣然未聞其某人進賢而蒙舉類之賞某人舉不肖而
受濫舉之罰此賢不肖所以不免混淆之蔽者殆謂此
也敢問西漢之法亦可施於今乎

問昔齊人之伐魯也當室如懸磬之時其勢可以舉魯矣及展喜犒師告之以先王之命而齊人乃還齊桓合諸侯之師以伐楚也革車千乘其勢可以勝楚矣及屈子如師責之以德綏諸侯齊侯卒受盟而還以此觀之則使人之有益於人之國也大矣向使行人失辭則兩國之存亡安危未可知也孔子曰誦詩三百使於四方不能專對甚哉使人之難也古者兵交使在其間方今朝廷西北之患師連未解安得其人如古之膺使者乎

策

試館職策

問古帝王遭時艱虞扶危救弊圖回治安者雖在聖哲不敢以易必深思長慮審所當務研極其至以定其不易之規模然後舉而措之見於施設則動無廢事衆功日興而大業以建爰稽其始究觀其終若合符節者蓋出於此子產謂政如農功日夜以思之思其始而圖其終朝夕而行之行無越思如農之有畔蓋不思其始終

而為之無畔徒欲力行雖勤無補若子產可謂知此道者周之宣王當小雅盡廢之時興衰撥亂一時修攘之事大略載於詩雅燦然可考亦未有不先規畫而後從事及要其成內外之治莫不畢舉遂致中興之隆豈非其成效大驗耶主上纂累聖之圖履艱難之運宵旰焦勞臨朝願治有年於茲矣總攬羣策講求政理常若不及然兵戈之餘流冗未復州縣之間沃壤多曠欲生聚之富而版籍未充欲藏用於民而賦斂未省荆襄淮甸

控制之衝也而屏藩未強諸道帥府方伯之職也而名實不副凡經理天下圖回恢復之計者其事固不可疏舉所當定其規模按而行之待以歲月使算計見效不愆於素以輯成中興之功者宜有必然之畫願條列而詳言之以竢上之採擇焉 對愚嘗觀富人家之作室也必先略基址具餼糧鳩材榦議版築相面勢之陰陽審堂室之高下然後度其材而用之大者為楹棟小者為椽楣又負偃植各安所施如是則不待勞筋苦骨

可以坐享廣廈之安矣又嘗觀良農之治田也必先相
行沃表原隰辨邱陵度肥瘠視土地之宜審種莖之種
高者以藝稷黍下者以植秔稌雨之霑足也則謹其耕
苗之猥大也則謹其耘實之堅好也則謹其穫如是則
不俟沾體塗足服芻艾衣襪襖袖手而獲倉箱之積矣
夫作室細務也治田鄙事也富人老農非有絕人之智
識也而且能區處規畫於其前享成勞於後又况聖人
之治天下開基創業垂無窮之統興衰撥亂而驟救傾

危以時者哉雖然富人之作室也身不親斤斧而有其
安良農之治田也手不事耨耨而有其利何者有梓匠
隸農為之服勤勞而致其力故也然則聖人之致治亦
在於得人而已矣漢高祖得一韓信世祖得一耿弇左
將軍得一孔明方其登壇於漢中之日請問於南陽之
時親顧於草廬之際則其所以制楚平莽之謀三分鼎
足之業固已豫圖之矣及其成功也如稼而穫如蠶而
績如力行而有所至無毫釐之差或可以槩見矣向使

人君謀之不素計之不熟徼幸於萬分之一待其不可
然後復狼顧而改圖無乃引歲月而隳成功耶愚嘗觀
自三代至今三千餘年中興之君而周漢二宣與夫唐
之明皇憲宗不與焉何則正朔不改於上臣民奉承於
下鐘簋不移社稷有奉雖其復文武之遠績革世宗之
餘弊平武韋之亂略除方鎮之跋扈其功烈鏗鉤炳耀
蕩人耳目然方之少康光武晉元則其功反小何也羿
之伐夏也更二姓而後復當時之人固已忘夏矣王莽

之盜漢也。歷十八年而後。平當時之人固已忘漢矣。司馬氏承魏之後。其所以繫民心者尚淺。則其復之也。蓋滋難於夏漢氏季世矣。而三君者皆能被苦。蓋蒙荆棘而拯其已墜之業。則與二宣兩宗之事。豈可同年而校其優劣哉。觀夫少康之犇有虞也。有田一成。則其地固狹矣。有衆一旅。則其人固寡矣。然終能戮澆殪而伏其辜。滅過戈而殲其類。祀夏配天。不失舊物。其功有光於此者乎。光武以疎屬而翔白水。起南陽新野之衆。用下

江平林之兵斬王尋王邑於昆陽破銅馬王郎於河北
曾未一星終而高祖之土宇固已復於版籍矣則業有
大於此者乎元帝以征東渡江則名號固未崇也三吳
之人莫有至者則人民固未附也方五胡流毒於黃河
之北而羣盜嗣虐於大江之濱然而能收拾豪俊振拔
滯淹陶士行擁六州之衆以寧荆郢王茂宏建分陝之
計而定江東典午之祚既絕而復續事有難於此者乎
蓋嘗原三君之所以能成其功烈後世望之若神人然

豈有他哉得人而已矣少康之興也則有女艾季杼為之腹心介牙光武之奮也則有寇鄧耿賈為之股肱輔翼而元帝之渡江也亦有王導周顛溫嶠之徒或負羈紲或謀帷幄或扞牧圉用能致力於當時由是觀之勢不在疆弱得人則昌時不在於治亂失士則弊前事之不忘後事之師也夫何遠哉恭惟主上以神武之資撫艱難之運躬節儉以紹開中興勞宵旰以洪宣祖業駐蹕七年於茲矣三時不害而年穀屢豐此天之所以愛

主上也前日之盜賊蜂聚蟻結處處而有比年以來日
朘月削寢以平定此天之所以祐主上也得天之贊得
民之助是宜恢復函夏清定海隅續宣化之業弛生民
之憂久矣然而陝西可平也而羣才未至於河內河南
可復也而置戍不踰於淮北前日強寇之侵雖折筭而
抉之去然嗣歲之秋固未免於蠢蠢也意者未得魁傑
俊偉而為之用耶將亦用之而未備耶或搜羅之道未
廣而巖穴幽隱尚有未盡出而為朝廷任使者耶不然

何功業之難建而曠日遲久如此也然則流冗之未復
沃壤之多曠版籍之未充賦歛之未省與夫控制之要
帥守之任是宜明策之殷殷下詢也顧愚淺陋何足以
奉承之請試言其略流冗之未復則安輯之版籍無自
而充土地荒蕪則賦歛何由而省控制之屏藩未彊則
戍守之策未盡也帥守之名實不副委任之責未專也
然此數者得其要則一舉而庶事畢修不得其要則雖
矻矻然事事而治之用力愈多而愈不治矣昔唐德宗

嘗患戍卒之多轉輸之不足李泌為陳富強之策其說以謂賈繒市牛於黨項令諸冶鑄農器募戍卒耕閒田逮其既熟之後官給高價而糴之戍卒貪懇田之利終更而願留者聽不過數歲則留者必衆如是府兵之法可復矣今愚之所陳者事雖有異於泌然一舉而衆事必得則或近似之矣夫民之所以失業兵之所以未彊者無他皆食不足之所致也足食之道不過在於務農而已秦人以力農兼天下漢武以屯田定西域曹公

之所以成霸業者本於積粟許下元帝之所以興復晉
室者亦能課督農業此非明效大驗耶今夫襄陽西接
中原東通吳會壽春北控梁宋西隣許潁其地皆沃野
千里畝收數鍾今若募軍民雜耕其地堅築壁壘積穀
以保衆寇至則戰無事則耕是常以我之靜逸待彼之
饑勞也與夫勞轉輸而滋久戍兵疲而民勞者其工拙
豈不相萬耶今夫我之所病者敵耳偽叛固無足畏敵
之與我戰也戰於萬里之內而偽叛之與戰也戰於千

里之內然敵之所以世為中國患者以其射鳥獸逐水草而居其轉徙去來不常此敵人之生業如中國之勤南畝也比年以來已非茹毛飲血之舊食粟衣繒與中國等今遠道入寇勢非齋糧不可是前世敵人之所以病中國者今亡矣此殆天假之便而為之然則捨高城深池屯田久戍縻以歲月而使之自病復出於何策哉若緣邊城壘既堅田野既墾失業之民就食者衆則民流土曠固非所患也以平糴之法積累於既熟之時修

勾踐之政養民於童穉之日則版籍之富賦歛之省又非所虞也城壘堅矣而無寇掠之患倉庾實矣而無轉輸之憂而猶或屏藩之未彊則嚴退軍之罰可也帥守之未副則重方面之任可也究數者之本則以足食為先而足食之道則以得人為本趙充國屯田於湟中而服先零孔明屯田於渭濱而抗曹丕祖士穉屯田於譙城而復河南向使漢晉之軍非得人而用之何以能成其功烈耶詩曰無競維人四方其訓之苟得其人四方

將以為法其於撥亂也何有胡不試迹宣王之事以觀之車攻吉日則言其田獵采芑六月則言其南征北伐之順竊考之於詩當時之功業班班可見然蒸民之所以美其致中興之由者不過任賢使能而已然則古之聖人所以勤於求才而逸於任使蓋知其要故也故區區之愚終始以得人為言不識可以裨國論之萬一乎至於議論之濶疎文辭之骯敝不足以仰副試言之意厚顏多矣惟執事實貫之

表

賀稱尊號表

誕受鴻名告類上帝乾文增耀日景愈輝允預照臨舉
深慶賴中賀臣聞聖人之德廣被則欣戴徧乎海邦中
國之仁外覃則樂推達於蠻貉恭惟皇帝陛下順天格
保迪德迓衡始若太王屈身而違獯鬻之患終如唐帝
中立而受可汗之稱孝養既申尊名益白我欲仁而仁
至天且不違後其身而身先福將焉往歡盟一定戎夏

咸休臣名在丹書獲觀盛節二國有好曾無標禾之勞
配天其澤空被函蒙之賜

藉田禮成表

鑾御青郊肇稱藉禮命陽官而祇事親一墀以致勤天
田既降於躬耕民畝自聞於昏作光垂史冊慶溢寰區
中賀竊以候陽瘳之方盈謹協風之初至咸戒農用欽
授人時所以供郊廟之粢盛所以教黎元於稼穡上先
勞而下悅民草偃而風行著在前經茲惟令典宣王復古

猶或忘后稷之功建武中興亦弗克永平之舉未有憲
章於祖宗之舊縣絕於軍旅之餘來世有稽於今為盛
恭惟皇帝陛下正德率下克勤於邦務其三時播厥百
穀庶人之終於千畝以示勤功帝藉之收於神倉用嚴
昭孝臣叨承郡寄企望齋宮聞勞酒之頒莫預終食之
列陳載芟之頌但同率土之心

賀正表

青煒御氣方迎發歲之祥垂象示民甫及始和之候詔

既敷於寬大物自趨於發生凡在照臨舉深慶賴伏惟
皇帝陛下海涵春育日運天行者昧俟時居豈安於鬱
鬱中興復古謨已並於明明方臨令吉之辰誕啟隆平
之運臣職叨居守地阻朝班稱漢殿之觴徒想臚傳之
句祝聖人之壽惟殫善頌之誠

鳳歷履端合乾坤之交泰侯邦受朔執玉帛以駿奔海

寓尊承天人悅豫中謝恭惟皇帝陛下聰明冠古孝道

通神業紹祖宗德流夷夏大一統之本旨得萬國之歡

心偃武修文克致太平之盛制禮作樂聿興極治之隆
臣叨領郡符阻陪班列三公奉璧想益備於漢儀萬壽
無疆願永歌於周雅

授時頒厯布治莫大於王春端辰臨朝綿宇咸歸於正
統肇茲嘉序運式昌期中賀恭惟皇帝陛下發揚乾剛
秉執聖道上齊七政撫三陽開泰之辰下括九圍體一
元端本之意振嘉生於率土均茂化於羣黎日月臨照
動植知慶而臣猥叨膺獎外假守符當少康之祀夏莫

預駿奔仰大舜之好生惟深忭蹈

歷象四時謹王春而正始車書萬里奉玉帛以來朝慶
協三靈民歸一德中賀恭惟皇帝陛下對時育物頒朔
治民正乾坤交泰之辰當日月重光之旦聲教訖爾以
無外典章燦然而一新禮講三朝奔走獻四方之籍樂
陳萬舞歡呼稱百辟之觴臣託備藩維叨承膺獎心雖
馳於魏闕頌莫奏於周京

房州貢生辰禮物表

遵常職而脩貢篚莫非任土之所生因彌月而薦壽儀
敢隆守邦之故事顧充庭之不腆撫小邑以增羞仰冒
疑嚴伏深惴恐中謝恭惟皇帝陛下虛無恬淡微妙淵
通道大無名功神莫測躬禹湯之盛德而大統有所承
蹈堯舜之遐風而高名無可議出作聰明之元后入為
博大之真人四方共瞻萬世咸仰臣猥貳郡政偶攝佐
符遇載誕之昌辰嗟莫陪於下列效包茅之入貢敢獨
後於衆人

天申節賀表

虹渚流輝宣重光於百世星樞動采紀盛旦之千秋
日月之照臨頌乾坤之悠久中賀恭惟皇帝陛下淵嘿儲
思清明在躬偃戈敦皇極之風篤孝奉慈寧之養歛時
五福同躋有道之長受祿萬年永燕無為之治時逢出
震序協乘離遙瞻北極之尊坐鞏南山之固臣謬膺文
郡密邇路朝瞻日觀以葵傾企冀階而獸舞美當報上
願歌天保之詩壽且多男請效華封之祝

賀與金國和表

女媧回稔禍致兩國之稱兵宗社再安賴一人之有慶回
勅敵之盛氣敦舊好之齊盟海縣弭寧人神悅豫肆頒
溫詔誕告殊方恭惟皇帝陛下以大禹之儉勤遇文王
之憂患寅畏不忘於罪已焦勞惟務於安民雖逢國步
之多艱終致皇天之悔禍遠法太王之事小足以興周
豈同鄭伯之下人僅能保國親屈帝尊之大駕俯臨郊
甸以議和顧惟委順之永圖允為生靈之至計遂使荷

戈之士獲聞偃伯之期方當詔語之敷宣不覺涕洟之
橫落臣濫紆郡紱何補縣官顧京邑之艱危獨抱申胥
之憤逮朝廷之和好嗟無魏絳之功空懷許國之丹衷
徒與遠民而共慶

賀皇后受冊表

臣伏觀邨報皇后受冊寶禮成中外臣寮拜表稱賀者
天地奠位日月正明燕及宗祧慶均寰海中賀竊以關雎
之風天下必本人倫王者之假有家孰先內助惟造端

乎夫婦者極其至則躋民於仁壽也斯無難從古所聞
莫茲為重恭惟皇帝陛下仰祇天顯俯示民彝考陰禮
於六官獨守雞鳴之德正母儀於萬國實由文定之祥
體既儷於宸嚴歡益協於長樂化行黎庶皆輯寧於室
家德茂螽斯將蕃有其孫子臣無任云云

擬進神宗實錄表

昭祖宗之大烈宜有信書委筆削於下臣實慙非任奏
編初御撫已增羞恭惟神宗皇帝道貫羲黃功超舜禹

憲章具備如日皎而天垂號令施行蓋雷厲而風靡仁
涵九有威懾殊方憂勤七閩之餘垂裕千齡之統布在
方冊炳若丹青中遭不令之臣公肆服讒之意猥因紀
述遂肆詆欺不知罪已而稱君專務附下而罔上敢誣
盛德幾類謗書黨與協姦人神共憤當上皇之臨御政
朋黨之方行逮淵聖之繼明屬倥傯之未給理如有待
端俟今朝恭惟皇帝陛下光紹丕圖欽崇祖武謂休功
偉績固當垂之於罔極而淫詞穢史豈宜宣示於方來

爰俾儒臣載刊牴牾兼存朱墨庶是非之可明刪去矯
誣俾議論之歸正事無遺落理則宣昭上足以慰在天
之靈下足以遺來世之事昔魏明之讀武紀徒追怒於
馬遷太武之悟國書第淫刑於崔浩方之盛世豈不多
慚但臣等誤玷使令匪能述作語任則無分於九牧量
才則深愧於三長惟僅足以成篇豈敢言於比事典章
之盛雖遠過於前王潤飾之功宜更湏於良史

欽定四庫全書

紫微集卷二十二

宋 張嶠 撰

表

天申節宰臣以下謝賜御宴表

運際昌期慶表猗蘭之瑞班聯邇服崇沾湛露之恩和
入八音驪均萬寓臣等誠懼誠忤頓首頓首竊以聖神
有作歷數攸歸夢日感星則祥發高穹澄河秀穗則珍
叢厚地實千載難逢之會昭一人有慶之符是知天祐

下民作君師紹隆炎運陽居大夏以長養茂毓神姿離
明瞻星火之中需樂玩雲天之象陳嘉肴於鎬飲奉僊
籟於韶音庸示宴慈當茲誕節若其魚在藻以樂豈鹿
食苹而鼓吹吉甫因征伐而歸賜之燕喜士會節春秋
而至饗以敬烝類有泛恩難同慶日此蓋伏遇皇帝陛
下瑤光感月神筮授天躬戴干懷斗之姿御合璧連珠
之歷推虞帝好生之意咸躋壽於綿區念姜嫄載育之
祥永承顏於長樂恩頒折俎沛及羣工臣等敢不飲聖

化之醇風味道真而肥國當既醉太平之日惟祝萬年
罄天保報上之心更祈百祿

慰永固陵復土表

同軌駿奔載考因山之典百司竣事已終復土之儀
在照臨舉深悲隕伏惟皇帝陛下道隆達孝禮厚飾終
昭事宗祊既歷烝嘗之奉崇成陵邑彌深凝慕之誠願
少抑於至懷用俯寧於羣品

賜御書樂毅論春秋左氏傳謝表

聖學淵深尚覃思於史傳宸章煥爛方親灑於牋毫寵
被侯邦光生儒館中謝臣聞連縱橫於六國獨樂毅為仁
義之師示褒貶於一王惟丘明得春秋之旨去古云遠
茲道不明兵法流於狙詐之家微言絕於異端之學故
二賢之盛美厯千載以難伸瞻仰餘風布方冊而具在
發揮後世遇聖神而益彰恭惟皇帝陛下繼好息民投
戈講藝分禹湯之暇日求燕魯之遺編著論釋經有此
著龜之訓盈箱積軸勒為奎壁之文事掩前規恩隆往

哲臣叨居外寄猥預榮觀恭拜豐珉喜與布韋而交慶
珍藏秘室願隨神物以護持

賜御書毛詩謝表

聖學緝熙兼總君師之任宸章燦爛發揮雅頌之傳光
被庶邦榮生多士中謝竊以六義之蘊有溫柔惇厚之風
八法之精具端勁邁偉之狀方游戲翰墨之際乃覃思
典籍之中天未喪於斯文世一過於大聖恭惟皇帝陛
下德並文武治隆成宣本教化以厚人倫追法二南之

美履艱難以致王業每思七月之陳故於一二日兢業之餘不忘三百篇諷刺之旨特紆睿藻載勒豐珉倬然雲漢之章煥若鈎奎之象臣猥分郡寄叨奉恩頌口誦心維蚤服孔庭之訓手舞足蹈茲借魯泮之儒

代盧尚書謝靖康覃恩表

配天立極履寶祚以維新渙爵疏恩推惠心於無外仰荷乾坤之施俯慙管蒯之微恭惟皇帝陛下敦敏狗齊聰明睿知久繫天人之望允膺圖籙之符潛德春宮天

下已陰受其賜垂衣南面百姓蓋無得而名爰因嗣歷
之初大霈敷天之澤日月臨照無幽隱之或遺雨露霑
濡何蕭茅之有間滌瑕蕩垢宥過推仁肆令罪戾之餘
亦玷龍光之寵臣敢不祇承睿渥欽奉皇慈自誓靡捐
力圖補報登車叱馭方趨蜀道之難戀闕傾心但覺堯
雲之遠

謝除敷文閣待制表

臣某言准尚書省劄子奉聖旨除臣敷文閣待制尋具辭

免奉聖旨不允陳力不能輒上奉祠之請布施優裕遂
叨次對之除辭避靡容凌兢失措中謝竊以西清嚴近之
地許以冒居蟠城要會之邦復令滿歲蓋本朝之所以
待賢俊亦漢廷之所以旌治能如臣何人併冒茲寵伏
念臣進由疏遠本乏技能被遇聖神嘗叨侍從不知盈
滿自取顛隳再蒙委任以來益務洒濯其過雖殫夙夜
難強疲庸弭謗自修未著藉茅之耻息黥補劓遽疏復
玷之恩仰戴洪私橫流哀涕此蓋伏遇皇帝陛下天地

覆幬靡不并容日月光明舉歸臨照每隆寬而厚下罔
求備以責人致使迂愚亦蒙獎拔臣敢不沐上恩之肉
骨誓盡力以撫民勉厲夙宵激昂衰退使豺狼不縱於
春圃庶愁歎可絕於里閭僅免空食敢言報國

代謝紹興十七年賜曆日表

治歷明時爰振百王之典頒常授事預知一歲之宜眷
寵新書恩隆睿意中謝恭惟皇帝陛下文思稽古聰明憲
天考克歷以定四時察舜璣而齊七政歲將即於更始

令誕布於維新豈徒俾晦朔而有知抑亦警官師之無曠三靈協慶萬國咸歡臣叨守郡符恪遵詔旨體輔相裁成之意宣化承流欽作訛成易之方務農重穀

代謝紹興十八年曆日表

堯歷肇修推閏餘而成歲夏時載叙頌正朔以示人凡曰承流由茲布治中謝臣聞分至啟閉皆天地化育之功生長收藏實帝王裁成其道故箕子陳其無易而左氏記以不愆欲應金穰宜調玉燭恭惟皇帝陛下明齊日

月化洽陰陽追既往之璣衡極知來之象數辰在大梁
之會參考尤精賜當太簇之初適遐均被臣叨膺外寄
猥預榮觀捧此彌文既深許於五紀施之庶務先力勸
於三農

代謝賜厯日表

厯象授時著於堯典歲年叙事見於周官聲教訖於海
隅拜賜來於天上謝皇帝陛下握樞臨極稽古凝猷躬
大禹之神重人統得時之正備宣尼之聖謹王春體元

之端鈎校舊儀審觀新度候協璣衡之運民知寒暑之期臣被命典州祇承頒朔之告職司宣化益茂勸民之方庶有助於涓埃用酬恩於高厚

謝郊恩表

迎長日之至求報本反始之宜因吉土於郊取貴誠上質之要一隆制作允屬聖神恭惟皇帝陛下修德錫符體元居正深仁撫育橐弓矢而戢干戈至誠感通時寒暑而節風雨孝治已臻於明察禮經敢後於憲章爰修

大旅之儀以懋中興之業牲陳繭粟器用陶甃以下民
咸憲之勤致上帝居歆之報推功不處均福無疆故得
萬國之心咸賴一人之慶臣身紆郡紱耳剝上儀莫施
奔走之勞徒預函蒙之澤

謝歷日表

考璣衡之密度協用九章頒正朔於遐方使知四序恭
惟皇帝陛下順稽五紀謹御三微察發斂於春秋居德
行於冬夏奉若天道欽授人時顧歷數之所加際寰區

而並用臣敢不恪遵夏啟寅奉周正觀橋運之推遷示農功之早晚

又

春元三統已祇奉於王正泥詔十行復叨承於漢札荷恩光之下逮知啟閉之攸宜竊以舜命羲和堯欽曆象歸餘舉正上明天道之盈虧東作南訛下示民時之早晚課清臺之密度謹太史之前占每因嗣歲之初誕舉授時之典車書所混正朔咸加雖曰故常實為異渥恭

惟皇帝陛下昭天配地既同化育之功治歷明時尤謹重黎之事思不奪於民力欲寅亮於天工咸使庶方奉行時令臣謹當推原德意宣諭詔音木鐸徇民敢後適人之職璇璣在上願修日御之官

擬留守司請回鑾表

習祥而征自潛消於敵氣振旅以入宜復幸於輿區敢控忱誠仰干睿德竊以衆人以宴安為意咸思克定於厥家王者撫艱難之時蓋或不常於厥邑是以漢祖之

戰京索時歸幸於櫟陽光武之復東京亦暫休於河內
皆匪定都之會實為稅衛之區眷此臨安久稽大駕雖
宮室卑陋弗稱於九重而井邑夥繁粗羸於七校况宦
寺之有所復廟祐之已安儻回曦馭之臨允慰斯民之
望恭惟皇帝陛下遠稽古昔下順黎元鑒黷武之無庸
知從欲之盡濟詔太僕而効駕命髦頭以先驅回軫旋
衡壹賜經行之復勞師休士聊稱告至之觴

除中書舍人兼直學士院謝表

臣某言伏奉告命授臣試中書舍人兼權直學士院仍改賜紫章服者中臺列屬方懼瘵官兩掖演綸忽驚誤寵復設禁林之直遂通法從之班拜命自天措躬無地臣某誠惶誠懼頓首頓首伏念臣稟資庸陋遭世聖明未踰歲月之間亟被聖神之眷洪恩不次人已銷其積薪素業無多才豈堪於視草顧若篆蟲之童技詎能黼黻於王猷方郁郁乎躋周監之時宜渾渾爾追虞書之體愧非鴻博難副選掄茲蓋伏遇皇帝陛下宣精帝文

暢道皇極程器能而並用姑欲試材與日月以合明悉
皆容照有如躡等時謂異恩而臣千載一時幸遇龍顏
之聖主四人三至勉追鳳閣之家聲竊伏而思未知所
報臣無任云云

代王帥謝除敷學表

天邑神明之奧方愧承流宸章秘密之藏遽叨更直游
蒙優渥深積凌兢中謝伏念臣材術拙疎性資凡下早被
先朝之眷遇浸膺上聖之使令擢臨清蹕之都入侍紫

荷之橐望輕銖兩不能使桴鼓之稀鳴費惜絲毫無以
得縉紳之虛譽方圖來效仰報殊恩敢謂眷私叙加甄
拔莫循牆而遜避惟負乘以憂虞此蓋伏遇皇帝陛下
丕冒堯聰曲加舜陟治致中興於至盛材多並蓄以無
遺雖甚庸虛亦加識擢臣敢不益堅愚慮師輦轂彈壓
之風庶展微勞為海岳崇深之補

代劉寶學謝表

禦魅嚴誅分畢身於裔土賜環趣名忽降德於中天既

蠲罪戾於丹書復竊寵名於紫禁恩光驟至涕泣橫流
伏念臣早以瑣材誤膺器使仰激聖神之遇每欲効忠
退惟義烈之門自應殉節會大臣有分陝之命仰明制
為入幕之賓遂陳力而弗辭庶因人以成事而臣雅無
勝算以佐元戎懼曠日而無成乃整軍而借一本恥大
還之役終為拜賜之師既臣卒之實奔何邦刑之敢違
固當自執其咎理難分諉於人至於斬將以弭煩言則
戶皆知其主名專威而多妄作則臣久離於幙府凡是

宣司之過舉悉皆歸怨於微臣雖欲加罪則其無辭乎
然其不善不如是甚也方責言之噂嗜必分顛隳賴上
德之照臨卒蒙全度逮茲起廢更荷包荒此蓋伏遇皇
帝陛下惡殺好生每存心於祝網寧僭無濫故數漏於
吞舟致此微生終歸善貸臣謹招三光而自列畢九死
以酬恩與其流離於瘴癘之鄉孰若馳驅於戎馬之際
尚收薄效以蓋曩愆

轉左朝散謝表

臣某言今月二日准告磨勣轉左朝散郎依前充敷文閣待制知衢州封賜如故者分符出守愧乏休稱會課當遷誤蒙信賞被寵光之狎至顧瑣質以奚堪祇受靡遑凌兢罔措中謝竊以虞舜極無為之治乃三考而陟明成周興泰和之風以六叙而正吏克循彛憲允屬熙朝伏念臣賦性迂疎逢時休運演綸圖任已叨鳳閣之詞臣試職承宣復綴甘泉之法從才微任重器小恩隆敢意序陞深憂曠責茲蓋伏遇皇帝陛下堯仁天覆湯聖

日躋庶績其凝黎民於變乾健而寧萬國邁追帝王之
殊勲離明而照四方盡復祖宗之舊典誕敷湛露激勸
臣工是致庸虛亦霑異數臣敢不仰遵聖訓恪奉郡條
誓殫撫字之勞期答生成之賜夙興夜寐戒伐檀貪鄙
之譏時和歲豐歌既醉太平之盛

代王侍郎謝表

方虞瘵曠莫承天府之流忽被褒遷進貳冬卿之職命
由中而莫及寵踰分以唯憂中謝伏念臣術昧通方人

常少與出際中興之運親逢聖上之知擢自計臺俾臨
京邑幾年試可曾無治狀之足稱庶役告成幸見禮文
之畧辨初欲自陳於懇款亟蒙賜對於親聞復奉訓辭
躋陞起部念八範五材之法有國大經在六官四屬之
間必人稱職夫何瑣質驟玷清班茲蓋伏遇皇帝陛下
盡飭羣倫鼎新百度謂名器不可以假每頒往稱朕命
之言欲技巧咸精其能故重疇若予工之選臣敢不勉
殫愚慮仰報睿思元首明而庶事康顯賡歌於虞典車

馬修而諸侯會期繼詠於周詩

貢銀絹表

策名委質咸抒享上之誠寸地尺天畢效充庭之貢敢
因方物用達愚衷恭惟皇帝陛下離日方升乾德廣覆
奉君道之慈訓號令一新體天德之好生仁恩四達神
靈歡喜廟社安榮玉帛萃於丹墀梯航來於裔土故雖
小壘亦致微儀就日望雲第竭祝堯之意式歌且舞永
肩戴舜之心

謝侍講表

柱史記言方懼空官之責經惟訪問誤叨勸講之除自
顧庸虛實慚冒昧竊以參稽舊史歷考前王法訓典以
修身莫尚多聞之益鑒興衰而自警孰先故志之知用
崇建於官聯以茂明於術藝惟我本朝之舊獨超三代
之隆顧雖多故之餘不忘於稽古豈俟偃兵之後始務
於談經宜得儒先助成講業如臣固陋曷稱詳延此蓋
伏遇皇帝陛下道本生知學惟日就覃思清燕既已窮

六藝之淵源造道宏深豈徒守諸生之章句仰惟大度
益務兼收雖如臣愚亦蒙器使卒華光之業固莫繼於
前修陪露門之遊其敢忘於大施

代謝樞密院表

孚號揚庭牢辭弗獲醜顏就列負愧采深中謝竊惟樞筦
之權允謂謀謨之府昔受任於戎馬之際誓捐軀於矢
石之間覬愴王靈式平亂畧雖奉令承教期不負於初
心而蒐乘訓兵終蔑聞於勝算既坐罔功而廢斥旋膺

趣召以來還始陪百辟於朝端得奉清塵於殿幄姑欲
拾遺補闕裨庶政於毫分豈期圖任疇庸還中權之要
近沐湛恩之甚渥懼陳力以奚勝矧國威方振於近年
然邊氛未衰於平日而臣於已試無聞之後用責成申
命之言義不可以辭難身固期於盡瘁惟師律有以制
勝則戎昭自然折衝如齊任夷吾終底九合之績晉登
卻縠爰收一戰之勲顧智畧之甚微何昔人之敢望獨
仗忱誠之感格庶幾廟社之安榮雖被恩之便蕃終撫

躬而惶悚此蓋伏遇皇帝陛下大魯公追戎之畧慕周
宣復古之規忘過記功方闢用人之道興衰撥亂將成
蓋代之功乃推求舊之私付以本兵之寄臣謹當捐身
殉國受命忘家仰體主恩既賞孟明之一眚益堅臣節
敢忘林父之盡忠

謝除中書舍人表

掌柱史之方書訖無稱迹贊掖垣之名命忽有趨踰隆
恩不聽於辭榮薄技蔑由於試可詔除優異負念凌兢

竊惟以道化民若文章固其餘事以言鼓衆非訓誥何以動人書命之司朝廷攸重是以感山東之父老本漢家寬大十行之書服河西之衆豪以天子明見萬里之外故鄭以公孫僑之善為辭令用能修好於諸侯而楚以觀射父之能道訓辭終以稱雄於上國況以渾灝之誥與夫深厚之文鼓舞四方彌綸庶務益使王言之大皆由帝制之明惟我皇朝齊驅治古若時掌誥皆號得人顧臣何為亦膺此選寵名已過負乘為慙况臣已竊

記言復陪約史比蒙恩詔更與經帷皆古今儒者之至
榮非渙忍下臣之所稱敢圖獎拔躡備論思取甘茂之
十官豈能無過兼諸梁之二事何以逃刑報稱是難靡
捐則易比蓋伏遇皇帝陛下隆寬盡下膺知有臨運既
啟於中興人自來於間出布昭神武會同已邁於六王
祓飾彌文號令方追於三代益廣并包之度兼收管蒯
之餘臣敢不仰體官施之大恩下奉職臣之所守雖盡
有司之業粗免空餐非逢致命之秋何能報賜

代房州謝表

佐奉常於列寺已玷清流叨共理於上庸謬膺假守拜
恩甚寵撫已若驚已見吏民敷宣德意中謝伏念臣奮由
寒士偶竊賢科賦性朴忠受才愚魯一行作吏分甘州
縣之徒勞五斗折腰敢謂事功之可立碌碌固無竒節
恂恂直若鄙人豈期拔於稠衆之中躡居羣俊之上校
讐冊府竊窺藏史之淵源庀職次卿豈識朝廷之典故
仰荷神聖之知遇殆非庸瑣之能堪常愧無基之厚墉

終以懷璧而賈害方圖自列已致人言雖悔可追寄願
無所曠官尸祿祇增小已之羞含垢匿瑕盡出大君之
賜恭惟皇帝陛下體乾之覆如春之生爵有德而祿有
功賞不僭而刑不濫閔一夫之失所欲萬物以由宜故
使孱微亦叨庇冒感深淪骨涕下霑衣臣敢不熟思往
愆力圖塵效奉寬大之詔願勤恤於齊民傾葵藿之心
常不忘於魏闕臣無任

云云

代劉鎮江謝上表

負罪投荒甫還故郡起家為吏遽竊左符便道之官消
辰布治荷恩優過感涕縱橫伏念臣資稟至疎術學甚
淺影纓入仕本先父之教忠陳力當官慕昔人之徇國
過不自料期於有成惟知軀命之可捐不悟智能之難
強存蒙器使每至顛濟原情惟在於妄庸論罪可逃於
誅殛博白萬里旋詔釋於纍囚漳浦踰年即聽歸於邑
里百身易殞洪造難酬自甘永棄於明時豈意更叨於
誤獎顧茲京口實蔽別都平時固號於名藩今日尤稱

為重鎮山川自若多六朝制勝之餘人物眇然豈北府
談兵之彥受任不稱居懷隱憂退省至愚曷膺是選此
蓋恭遇皇帝陛下肇開興運因任羣材謂使過愈於使
功而臣每懷於贖罪謂知彼等於知己而臣嘗備於乘
邊爰從徒隸之中付以翰蕃之寄臣敢不仰懷恩遇深
激懦衷奉條教以牧民稟謀謨而固圉苟可効節不憚
殺身庶收標末之勞少答生成之賜

代人謝資政殿學士提舉萬壽觀兼侍讀表

蠲丹書之大譴竊秘殿之隆名既叨優秩於殊庭復冒
寵榮於經幄恩光沓至愧懼交深中謝伏念臣早以綿才
誤膺器使寢蒙宸眷亟躡近班屬桀逆之滔天率臣隣
而敵愾賴宗社之祐助戮鯨鯢於浹旬爰以微勞遽登
右府俄承命而分陝遂抗節以宣威念天步之艱難軫
宸衷於宵旰思效臣節庸報國恩深惟尊主庇民之方
莫先整軍經武之實始勤服於夙夜冀有成勞逮喪地
於邊陲卒愆素意荷隆恩而免戾當竭力以圖功愧無

曹沫之能復還侵地雖抱樂羊之志徒積謗書儻非上
聖之深知蓋將無辭而自白既蒙昭雪復荷甄收恩施
如斯報稱曷以茲蓋伏遇皇帝陛下如天地之覆幬何所
不容若日月之照臨無幽不燭遂使阽危之際終蒙全
度之仁臣謹當彌厲初心勉圖未效顧寇讐之縱橫何
以家為惟忠憤之激昂未知死所

欽定四庫全書